

Служба обща  
священномученику Российскому 20-го века единому,  
архиерею или иерею.

Вечер

На Господи, возвах: **стихиры, глас 1.**

**Подобен: Прехвальнии мученицы:**

Прехвальне священномучениче (*имярек*),/ ты ни темница изнурила  
есть,/ ни глад умори,/ ни озлобления и раны смятоша,/ во еже разлучити тя от  
любве Божия/ и благодарованныя паствы./ Темже Христу, святе, молися/  
даровати Церкви нашей/ мир и велию милость.

Всехвальне священномучениче (*имярек*),/ от братьий по плоти страдания  
до крове претерпевая,/ в себе помышлял еси,/ яко Господа ради умерщвляеми  
есмы/ и несть наша брань противу плоти и крови,/ но к миродержителю тьмы  
века сего./ Темже Христу, святе, молися,/ даровати земли нашей,/ мир и  
велию милость.

Преславне священномучениче (*имярек*),/ ты жертву безкровную/ первее  
благоговейне совершая,/ послежде, яко всеплодие,/ себе самага в жертву  
живую принесл еси,/ моля, да простится грех богоборчества народа нашего./  
И ныне Христу, святе, молися/ даровати людем российским/ мир и велию  
милость.

**Слава, глас тойже:**

Церкве Российския славо/ и отечества нашего украшение,/ священномучениче (*имярек*),/ властью от Бога тебе данною,/ ругатели  
безбожныя обличал еси,/ и, яко волки лютыя, от стада твоего отгнал еси/ и  
диавола посрамил еси,/ кровь же твоя, яко Авелева,/ от земли нашея вопиет  
немолчно./ Сего ради ходатай на Небеси о нас верен буди/ и моли спастися  
душам нашим.

**И ныне, Богородичен: Всемирную славу:**

**Вход. Прокимен дне. И чтения.**

**Деяний святых апостол чтение (глава 4):**

Во дни оны,/ глаголющим апостолом к людем,/ наидоша на них  
священники и воевода церковный и саддукеи,/ жаляще си, за еже учити им  
люди и возвещати о Иисусе воскресение мертвых/ и возложиша на них руки  
и положиша их в соблюдение до утрия,/ бе бо вечер уже./ Мнози же от  
слышавших слово вероваша/ и бысть число мужей яко тысящ пять./ Бысть  
же наутрие собратися князем их/ и старцем и книжником во Иерусалим,/ и  
Анне архиерею, и Каиафе, и Иоанну, и Александру,/ и елицы беша от рода  
архиерейска/. И, поставльше их посреде, вопрошаху:/ кою силою или коим  
именем сотвористе сие вы?/ Тогда Петр, исполнився Духа Свята, рече к ним:/  
князи людстии и старцы Израилевы,/ аще мы днесь истязуеми есмы о  
благодеении человека немощна,/ о чесом сей спасеся,/ разумно буди всем вам  
и всем людем Израилевым,/ яко во имя Иисуса Христа Назореа,/ Егоже вы  
распясте, Егоже Бог воскреси от мертвых,/ о Сем сей стоит пред вами здрав./  
Сей есть Камень, укоренный от вас, зиждущих,/ бывый во главу угла, и несть

ни о едином же ином спасения./ Несть бо иного имене под Небесем, даннаго в человецех./ о немже подобает спастися нам.

**Деяний святых апостол чтение (глава 4):**

Во дни оны./ видяще иудеи Петрово дерзновение и Иоанново/ и разумевше, яко человека не книжна еста и проста, дивляхуся./ знаху же их, яко со Иисусом беста./ Видяще же исцелевшаго человека с нима стояща./ ничтоже имяху противу рещи./ Повелевше же има вон из сонмища изыти./ стязахуся ко друг другу, глаголюще:/ что сотворим человекома сима?/ Яко убо нарочитое знамение бысть има./ всем живущым во Иерусалиме яве./ и не можем отрещися./ но да не более прострется в людех./ прещением да запретим има/ ктому не глаголати о имени сем ни Единому от человек./ И, призвавше их./ заповедаша има отнюд не провещавати./ ниже учити о имени Иисусове./ Петр же и Иоанн, отвещавше к ним, реста:/ аще праведно есть пред Богом/ вас послушати паче, нежели Бога, судите./ не можем бо мы, яже видехом и слышахом, не глаголати./ Они же, призапрещше има, пустиша я./ ничтоже обретше како мучити их, людей ради./ яко вси прославляху Бога о бывшем./ лет бо бяше множае чотыредесяти человек той./ на немже бысть чудо сие исцеления.

**Деяний святых апостол чтение (глава 4):**

Во дни оны./ отпущена бывша апостола./ приидоста к своим и возвестиста./ елика к нима архиереи и старцы реща./ Они же, слышавше./ единомушно воздвигоша глас к Богу и рекоша:/ Владыко, Ты, Боже, сотворивый небо и землю, и море, и вся, яже в них./ Иже усты Давида, отрока твоего рече:/ вскую шаташася языцы./ и людие поучишася тщетным?/ Предсташа царие земстии./ и князи собрашася вкупе на Господа и на Христа Его./ Собрашася бо воистинну во граде сем на Святаго Отрока твоего, Иисуса, Егоже помазал еси./ Ирод же и Понтийский Пилат с языки и людьми Израилевыми./ сотворити, елика рука Твоя и совет Твой преднарече быти./ И ныне, Господи, призри на прещения их/ и даждь рабом Твоим со всяким дерзновением глаголати слово Твое./ внегда руку Твою прострети Ти во исцеления./ и знаменем и чудесем бывати именем святым Отрока Твоего Иисуса./ И помолившись им, подвижеся место, идеже бяху собрани./ и исполнишася вси Духа Свята/ и глаголаху слово Божие со дерзновением.

**На стиховне стихиры, глас 6.**

**Подобен: Трдневен:**

Столп непоколебимый Русския Церкви был еси./ гонения лютая претерпевая./ день и ночь в молитве подвизался еси./ священномучениче (имярек)/ огнем ревности и духом кротости/ паству твою ко Христу путеводя./ тем тя любовию почитаем.

**Стих:** Священницы Твои облечутся в правду/ и преподобнии Твои возрадуются.

Верен Богу и Церкви был еси даже смерти./ священномучениче (имярек)/ ныне же, с лики новомученик и исповедников Российских./ предстоя Христу Царю./ молися с ними прилежно/ даровати нам мир/ и велию милость.

**Стих:** Честна пред Господем/ смерть преподобных Его.

Душевная и телесная страдания твоя/ и смерть за Христа вольная от безбожных / отверзоша ти, святе (*имярек*),/ врата жизни вечныя/ и укрепиша братий твоих исповедати Христа./ Темже Ему молися присно,/ да утвердятся Православие на Руси во веки.

**Слава, глас 4:**

Ангели страданием твоим дивляхуся/ и Церковь Небесная радостно тя прият,/ достохвальне (*имярек*)./ Ныне же, священней руце твои/ к Престолу Святыя Троицы простирая,/ поминай землю Русскую,/ юже возлюбил еси,/ моля о спасении славящих тя благочестно.

**И ныне, Богородичен, глас тойже:**

Призри на моления Твоих раб, Всенепорочная,/ и всякия скорби избави землю Русскую,/ дом Твой нареченную/ и кровью новомученик освященную./ Да не постыдимся, Владычице Державная,/ Тя призываюции,/ Ты бо еси православных помощь,/ радость и покров,/ и спасение душ наших.

**Тропарь, глас 3:**

Церкве Русския столпе непоколебимый,/ благочестия правило,/ жития евангельскаго образе,/ священномучениче (*имярек*),/ Христа ради пострадавый даже до крове,/ Егоже моли усердно,/ яко Начальника и Совершителя спасения,/ Русь Святую утвердити в Православии/ до скончания века.

**На утрени**

**По 1-м стихословии седален, глас 6:**

Сквозе огонь мучения, яко свидетель верный, прошел еси,/ блаженне (*имярек*),/ сего ради с лики святых земли Русския/ в Небесном Отечестве торжествуеши./ Помози и нам быти верным Христу/ и спастися душам нашим.

**Слава, и ныне, Богородичен:**

О, Всепетая Дево,/ Тя вемы Покров земли Русския,/ Тебе бо, грешнии, имамы предстательство,/ Тебе стяжахом в напастех спасение,/ Едину Всенепорочную.

**По 2-м стихословии седален, глас 2:**

Болезнями и страдании твоими, священномучениче (*имярек*),/ Бога прославил еси/ и ходатай верный о нас явился еси./ Сего ради с любовию вопием ти:/ не престай молитися о чтущих святую память твою.

**Слава, и ныне, Богородичен:**

Молитвеннице теплая,/ Заступнице рода христианскаго,/ прими моления раб Твоих/ и осени Русь Православную покровом Твоея благодати.

**Величание:**

Величаем тя,/ священномучениче (*имярек*),/ и чтим честная страдания твоя,/ яже за Христа во утверждение на Руси Православия/ претерпел еси.

**Псалом избранный:**

Бог нам Прибежище и Сила.

Господи, воздвигни силу Твою и прииди, во еже спасти ны.

Глаголах о свидениях Твоих пред цари и не стыдяхся.

Вси языцы обыдоша мя и именем Господним противляхся им.  
Тебе ради умерщвляемся весь день, вменихомся, яко овцы заколения.  
Крепость моя и пение мое Господь и бысть мне во спасение.

**По полиелеи седален, глас 1:**

Доблий страдальче и служителю Таин Божиих,/ священномучениче (*имярек*), Церкви Русския похвало и утверждение,/ ныне, празднующе твою память,/ Богу, прославльшему тя, благодарственно вопием:/ слава Давшему ти крепость во страданиях,/ слава Венчавшему тя,/ слава Спасающему нас твоими молитвами.

**Слава, и ныне, Богородичен:**

Предстательнице теплая и Заступнице усердная,/ в годину безбожия от конечныя погибели/ землю Русскую всемошным ходатайством к Сыну Твоему избавльшая./ И ныне не остави нас молитвами Твоими, Владычице Богородице.

**Степенна 1-й антифон 4-го гласа. Прокимен, глас 4:** Приидохом сквозе огонь и воду/ и извел еси ны в покой. **Стих:** Разжегл ны еси, **якоже** разжизается сребро. **Всякое дыхание: Евангелие от Матфея, зачало 36.**

**По 50-м псалме стихира, глас 6:**

Егда попусти Господь по грехом нашим,/ братоубийство, гонения и веры Христовы поругание,/ ты, священномучениче (*имярек*),/ Церкви Российския столп непоколебимый явился еси/ и, кровь свою за Христа пролив,/ паству во единстве соблюл еси./ Ныне же, на Небеси предстоя с лики новомучеников,/ моли спастися душам нашим.

**Канон, глас 4.**

*(Аще священномученик – пресвитер, глаголи, яже во окружи)*

**Песнь 1**

**Ирмос:** *Моря чермную пучину/ невлажными стопами/ древний пешешествовав Израиль/ крестообразными Моисеовыма рукама/ Амаликову силу в пустыни победил ест.*

Воли Божией послушлив быв,/ святительства жезл (**священства дар**) приял еси, священномучениче (*имярек*),/ и, за Христа даже до смерти пострадав,/ верный сын Церкви явился еси.

Изгнание и разлучение с паствою твоею мужественно претерпел еси, священномучениче (*имярек*),/ но ничтоже возможе разлучити тя от любве Божия.

Безбоязненно проповедовал еси людем покаяние, священномучениче (*имярек*),/ да обратят сердца своя к Богу/ и токмо на Него в скорбех и лишениях упование имут.

**Богородичен:** Мати Божия,/ Дом Твой, Святая Русь, молит Тя:/ избави люди Твоя от всякия нужды и вечнаго осуждения.

**Песнь 3**

**Ирмос:** *Веселится о Тебе церковь Твоя, Христе, зовущи:/ Ты моя Крепость, Господи,/ и Прибежище и Утверждение.*

Егда прииде испытание веры твоея, священномучениче (*имярек*),/ страдание за Христа, яко благодатный дар, приял еси/ и кровию твоею русскую землю обагрил еси.

Егда прииде гонения от безбожных,/ столп непоколебимь Русския Церкви явился еси, священномучениче (*имярек*),/ святых, яко ближних сродник, в помощь призывая./ С нимиже купно ныне прославляеши.

Аще и умерщвлен был еси телом, священномучениче (*имярек*),/ обаче духом козни диавольския посрамил еси,/ имея Христа Прибежище и Утверждение.

**Богородичен:** Тя Предстательницу, Пречистая Дево, молим:/ преложи нашу печаль на радость/ и скорбилежащая избави, Заступнице наша.

#### Седален, глас 3:

Заветы исповедников и священномучеников Христовых восприем,/ душу твою за веру Православную положил еси, святе,/ еюже утверждается Земля Русская./ Сего ради молися, священномучениче (*имярек*),/ любовию чтущим тя верным Христу до конца быти.

#### Слава, и ныне, Богородичен:

Не имамы инаго прибежища разве Тебе, Богородице,/ отечества нашего усердная Заступнице:/ всяк бо, почитая Тя, надежду обретает.

#### Песнь 4

*Ирмос:* Вознесена Тя видевши Церковь на Кресте,/ Солнце Праведное,/ ста в чине своем,/ достойно взывающе:/ слава силе Твоей, Господи.

Да не дерзают языцы рещи: где есть Бог ваш?/ Кровь бо новомучеников от земли наша вопиет:/ Господи, Господь наш, яко чудно имя Твое по всей Русстей земли.

Имже образом желает елень на источники водная,/ сие ты, стратотерпче (*имярек*),/ к живоносным страданиям за Христа притекл еси,/ имиже присно священо обновляется лице земли Русския.

Вся земная ни во что вменив Христа ради,/ словом и житием, священномучениче (*имярек*), верных поучал еси:/ о Бозе сотворим силу/ и Той уничижит стужающыя нам.

**Богородичен:** Стена неборимая и Покров всемогущий Российским новомучеником явилася еси, Пресвятая Дево,/ темже Тя величаем.

#### Песнь 5

*Ирмос:* Ты, Господи, мой Свет/ в мир пришел еси,/ Свет святой, обращающий из мрачна неведения,/ верою воспевающыя Тя.

Яко лучь Солнца Правды явился еси, священномучениче (*имярек*),/ и страданиями твоими мглу безбожия над Отечеством нашим рассеял еси.

Егда безбожнии тщахуся сокрыти тя в темнице, священномучениче (*имярек*),/ Господь яви тя исповедника Своего всем концем Земли Русския.

Русския Церкви светильниче священный, (*имярек*),/ кровью мученическими неугасимо светяй и у Престола Божия предстояй,/ молися о чтущих тя.

**Богородичен:** Иже от Девы неизреченно рождейся, Господи,/ сохрани молитвами Ея Церковь Твою,/ Тебе славящую православными гласы.



## Песнь 6

*Ирмос: Пожру Ти со гласом хваления, Господи,/ Церковь вопиет Ти,/ от бесовския крове очищися,/ ради милости от ребр Твоих/ истекшею Кровию.*

Восприим мечь духовный, иже есть глагол Божий,/ безбожных козни сокрушил еси, священномучениче (*имярек*),/ и вся разжженные стрелы лукаваго угасил еси/ щитом веры Православныя.

Во святителех (*священниках*) благочестно пожив/ и мучения путь терпеливно восприим,/ сугубую мзду на Небесех обрел еси, священномучениче (*имярек*),/ идеже евангельски присно радуешься и веселишися.

Ничтоже возможе разлучити тя, богоприятне, от любве Христовы:/ ни скорбь, ни гонение, ни смерть,/ вся бо сия силою Возлюбльшаго тя Господа препобедил еси, священномучениче (*имярек*).

**Богородичен:** Поем Тя, Предстательнице теплая и Заступнице христиан, Богородице Всепетая,/ яко со всеми святыми земли Русския молиши Сына Твоего и Бога нашего обрести нам велию милость.

### Кондак, глас 2:

Восхвалим, вернии,/ изряднаго во святителех (*священниках*)/ и славнаго в мученицех (*имярек*),/ Православия поборника и благочестия ревнителя,/ Земли Русския красное прозябение,/ иже страданием Небесе достиже/ и тамо тепле молит Христа Бога/ спастися душам нашим.

### Икос:

Красуйся и ликуй, Церковь Русская,/ яко благоплодная лоза священнаго страдальца израстившая,/ добропобедным мучением сердца верных укрепившаго,/ заповеди Господни исполнившаго и присно евангельски учившаго:/ приидите, чада, послушайте мене,/ не убойтесь от убивающих тело, души же не могущих убить,/ убойтесь же паче могущаго душу и тело погубити в геенне./ Темже, священномучениче (*имярек*), моли Христа Бога спастися душам нашим.

## Песнь 7

*Ирмос: В печи авраамстии отроцы персидстей/ любовью благочестия паче,/ нежели пламенем опаляеми взываху:/ благословен еси в храме славы Твоя, Господи.*

Яко трие отроцы в печи Вавилонстей пламенем объятии молитвою не сгараху,/ тако ты, священномучениче (*имярек*), во огни мучений благодатию веру сохранил еси./ Сего ради ныне с новомученики Российскими ликуеши:/ благословен еси, Боже отцев земли наша.

Якоже древле отроцы, в печи неопалееми, златому истукану не поклонися,/ тако же и ты, священномучениче (*имярек*), огнем мучений неопалеемь,/ безбожие небоязненно обличал еси, взывая с новомученики Российскими:/ благословен еси, Боже отцев земли наша.

Жертву живую и всесожжение Творцу себе самага принося, священномучениче (*имярек*),/ с новомученики Российскими воспевал еси:/ могущи покаряться, яко с нами Бог отцев земли наша.

**Богородичен:** Яже паче ума и естества Бога рождши, Неискусомужная Марие,/ чтущыя Тя от враг видимых и невидимых избави,/ Ты бо еси земли отцев наших Держава необоримая.

### Песнь 8

**Ирмос:** Руце распростер Даниил,/ львов зияния в рове затче,/ огненную же силу угасиша,/ добродетелию препоясавшися,/ благочестия рачители отроцы взывающе:/ благословите, вся дела Господня, Господа.

Землю Русскую, безбожными гонении нещадно жегомую,/ слезами и кровью твоими напоил еси, священномучениче (*имярек*),/ сего ради плоды веры, чада церковная, возрастил еси.

Злобы мучителей не убоялся еси,/ огнем любви Божественныя тыя препобедив,/ темже благодать молиться о нас стяжал еси, священномучениче (*имярек*), достохвальне.

Благословляя гонителей твоих, блаженне (*имярек*),/ усердно молился еси за них, да покаются / и купно с верными братьями благословят Господа.

**Богородичен:** Христа зрящи умерщвляема, Многопетая Владычице,/ и, видящи исполнение Симеонова проречения, слезящи, взываше:/ благословен еси, Боже, во веки.

### Песнь 9

**Ирмос:** Камень нерукосечный/ от Несекомыя Горы, Тебе, Дево,/ краеугольный отсечеса,/ Христос, совокупивый разстоящаяся естества,/ тем, веселящися, Тя, Богородице, величаем.

Руками беззаконных убиен,/ жертва благоприятная и вольное заклание Богу принеслся еси, святче Божий (*имярек*),/ Тем благодарне память твою почитаем.

Господь, исполняя смотрение Свое о Церкви Русстей,/ заступника тыя, священномучениче (*имярек*), содела./ Темже молился Ему,/ во благочестии нам пребывати и спастися душам нашим.

О, бездна благости Божия!/ Дарова бо Бог возлюбленным Своим веры ради пострадати,/ и ты, священномучениче (*имярек*), / яко плод красный спасительнаго сеяния, избра от земли Русския.

**Богородичен:** Разори советы вся на ны вооруженныя, Мати Бога Вышняго,/ и радости исполни уповающыя на Тя,/ да усердно вси Твое проповедуем заступление.

### Светилен:

Паству хлебом слова Божия насыщая/ и вином премудрости священныя напоая,/ теплотою любви твоя дары сия растворил еси, священномучениче (*имярек*),/ и ныне высоким проповеданием вещаеши чадам Церкви Русския:/ приступите ко Господу и просветитесь,/ и лица ваша не постыдятся.

### Слава, и ныне, Богородичен:

О, Тебе мы хвалимся, Богородительнице,/ и к Богу Тя имамы Предстательство,/ прости руку Твою необоримую/ и сокруши враги Церкви Русския.

На хвалитех стихиры, глас 4.

Подобен: Дал еси знамение:

Дал еси знамение/ земли Русстей, Господи,/ священномученика угодника Твоего, (*имярек*),/ яко да тем умолен бывая,/ отвратиши праведный Твой гнев,/ и не погибнет Святая/ и Боголюбивая Русь/ предстательством новаго страстотерпца.

Жертву хваления/ присно Господеви принося,/ священномучениче (*имярек*),/ в конец самага себе/ в жертву живу и святу,/ благоугодну и совершенну представил еси,/ темже ти верно вопием:/ благоприятны сотвори молитвы наша/ о благостоянии Церкви Русския.

Предстателю Церкви Русския,/ священномучениче (*имярек*) всехвальне,/ выну зряй Лице Господа на Небесех,/ не презри ни единого/ от малых чад Ея,/ но радостно покаяние наше приими/ и моли присно/ сыновом Российским спастися.

**Слава, глас 8.**

**Подобен: О, преславнаго чудесе:**

О, преславнаго чудесе!/ Яко крин посреде терния,/ в страданиях за Христа процвел еси,/ священномучениче (*имярек*),/ да не затмится в земли нашей свет Православия/ во откровение языком и славу народа Русскаго./ И ныне, в селениях райских пребывая,/ неувядаемо благоухаеши/ вере твоей подражающим.

**И ныне, глас и подобен тойже:**

О, преславнаго чудесе!/ Небесе и земли Царица/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ О. Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь.

**Славословие великое. И отпуст.**

**На Литургии**

**Блаженна от канона песни 3-я и 6-я. Прокимен, глас 7: Честна пред Господем / смерть преподобных Его. Стих: Что воздам Господеви о всех, яже воздаде ми? Апостол к Римляном, зачало 99 (8, 28-39). Аллилуиа, глас 2: Священницы Твои облекутся в правду/ и преподобнии Твои возрадуются. Стих: Бог нам Прибежище и Сила, Помощник в скорбех, обретших ны зело. Евангелие от Луки, зачало 106, (21, 12-19). Конец: В терпении вашем стяжите душа ваша. Причастен: В память вечную будет праведник:**

**Молитва**

О, избранниче и угодниче Христов, священномучениче (*имярек*), Церкви Русския столпе непоколебимый, земли наша благое прозябение и красный плод, сродников твоих предстателю и наставниче!

Ты во время гонения безбожнаго от сокровищницы души твоея спасительное исповедание Православныя веры изнесл еси, и людем верным пастырь добрый явился еси, душу твою за Христа и Его овцы полагая и лютыя волки далече отгоняя.

Ныне убо призри на нас, недостойных чад твоих, умиленною душею и сокрушенным сердцем тя призывающих. Умоли Господа Бога, да простит согрешения наша и избавит от адовых уз и вечнаго мучения. Утверди нас в



вере святых, научи нас всегда творить волю Божию и хранить заповеди церковныя. Буди пастырем нашим - правило веры, воином – вождь духовный, болящим – врач изрядный, печальным – утешитель, гонимым – заступник, юным – наставник, всем же благосердый отец и теплый молитвенник, яко да молитвами твоими соблюдется в Православии Святая Русь и непрестанно славится в ней имя Пресвятыя Троицы, Отца и Сына и Святаго Духа во веки веков. **Аминь.**